

DOMINGU III TEMPU PÁSKUA NIAN – TINAN C

Tema

Liturjia Domingu III Tempu Páskua nian fó hanoín mai ita katak komunidadade sarani nia misaun mak fó sasin no konkretiza projetu libertadór ne'ebé jezús hahú ona; no katak Jezús ne'ebé moris hi'as akompañá nia Kreda iha misaun, hodi hamoris nia ho ninia prezensa no orienta nia ho nia Liafuan.

Leitura dahuluk apresenta mai ita sasin ne'ebé komunidadade Jerusalém nian fó kona-ba Jezús moris-hi'as. Maski mundu ba kontra projetu libertadór sarani sira-nian, ema sarani tenke uluknanai obedese Maromak duké ema sira.

Leitura daruak apresenta Jezús, “bibi-oan” ne'ebé ema oho no manán mate no lori ba ema sira libertasaun definitiva; iha kontestu litúrjiku, autór tau kriaun tomak ne'ebé hatudu nia ksolok no louvór/hahín ba “bibi-oan” ne'ebé manán.

Evanjellu apresenta díxipulu sira hala'ó misaun, hodi kontinua Jezús nia projetu makso'ik; maibé aviza katak díxipulu sira-nia hahalok sei hetan ézitu de'it bainhita sira hatene rekoñese Na'i Moris-hi'as ne'ebé besik ba sira no husik Nia gia sira ho ninia Liafuan.

LEITURA I – Apost 5,27b-32.40b-41

Entre kapitulu 2,1 no 8,3, Livru Apóstolu sira nia Hahalok, hato'ó Kreda Jerusalém nia sasin kona-ba Jezús. Komentadór sira babain hanaran kapitulu 3-5 ho “sesaun naran nian”, basá sira haktuir anúnsiu kona-ba Jezús nia “naran” (kf. Apost. 3,6.16;4,7.10.12.30;5,28.41), katak, Jezús rasik (“naran” mak liafuan judeu sira uza atu temi Maromak; uza liafuan Jezús nia naran ekivale hateten katak Nia mak “Na'i”). Anúnsiu ne'e mak Apóstolu sira nia obra maski hasoru kondisaun difikuldade maka'as (tanba opozisaun husi líder judeu sira). Iha testu ne'ebé ohin propoin mai ita, ita haree Pedro no apóstolu seluk nia testemuñu kona-ba Jezús. Judeu sira kaer sira maibé Maromak liberta sira (kf. Apost. 5,17-19), no sira fila fali ba Templu atu fó sasin kona-ba Kristu ne'ebé moris-hi'as (kf. Apost. 5,20-25). Kaer fali de'it sira, ema lori sira ba autoridade relijioza aas liu nasaun nian nia oin (Sinédriu) no ho modu formál bandu sira atu fó sasin, maibé apóstolu sira hatán hodi apresenta rezumu kerigma primitivu.

MENSAJEN

Pedro nia fraze “tenke uluknanai obedese Maromak molok ema” (vers. 29) mak tema sentrál iha testu ne'e; fraze ne'e define ema sarani nia atitude bainhira enfrenta mundu nia opozisaun.

Kona-ba rezumu doutrinál iha vers. 30-32, ne'e mak kerigma primitivu kona-ba Jezús: mate iha krús, moris-hi'as, hatodan an iha Maromak nia kuana, apresentasaun nu'udar Masoi'k no apóstolu sira nia sasin hodi Espíritu nia kbiit. Iha kontestu ne'e, hatudu maka'as Sinédriu nia responsabilidade ba eskándalu krús nian no kontrapozisaun entre Maromak nia hahalok no autoridade judaika nia hahalok hasoru Jezús.

Opozisaun umana hatudu sai realidade kona-ba mensajen kerigma nian ne'ebé la mai husi ema, nia kbiit ema labele hapara nune'e mós komunidadade nia dinamizmu ne'ebé simu kbiit

husi Espíritu. Se Jezús hasoru oponente sira no mate iha krús, naturál atu apóstolu sira, ne'ebé fiél ba Jezús no ba ninia projetu, tenke hasoru ho opozisaun hanesan ne'ebé oho Jezús. Maski nune'e, ema ne'ebé tuir duni Jezús no nia projetu – hodi Espíritu nia kbiit – sira preokupa liu ho fidelidade ba Jezús nia “dalan” duké ba ema nia orden ka interese – maski mai husi sira ne'ebé manda iha mundu karik bá.

LEITURA II – Ap 5,11-14

Parte daruak livru Apokalipse nian (kap. 4-22) apresenta mai ita buat ne'ebé ita bele hanaran “leitura profétika ida istória nian”: autór apresenta istória umana iha perspetiva esperansa nian, hodi hatudu katak sarani sira ne'ebé hetan persegisaun husi impériu la ta'uk buat ida tanba vitória finál pertense ba Maromak no sira ne'ebé mantein fiél ba Maromak nia projetu. Testu ne'ebé propoin mai ita halo parte vizaun inisiál, iha-ne'ebé “profeta” João apresenta personajen sentrál sira ne'ebé sei intervein iha istória umana: Maromak, iha leten aas bá no kbiit wain, tuur iha nia tronu, ho Maromak nia Povu hale'u nia nune'e mós kriasuan tomak (kf. Ap 4,1-11); hafoin, “livru” iha-ne'ebé, simbolikamente, kontein Maromak nia planu kona-ba umanidade (kf. Ap 5,1-4); finalmente, apresenta mai ira “bibi-oan” (Jezús), nia ne'ebé kaer kbiit nia totalidade (“dikur hitu”) no matenek nian/koñesimentu nian (“matan hitu”); nia de'it mak soi atu lee livru (katak, revela, haklaken, konkretiza ba ema sira projetu salvaun husi Maromak).

MENSAJEN

Personajen fundamentál iha leitura daruak ohin nian mak “bibi-oan”. Nia mak símbolu ne'ebé autór Livru Apokalipse nian uza atu ko'alia kona-ba Jezús.

Símbolu “bibi-oan” mak símbolu ida ho densidade teolójika boot, ne'ebé konsentra no evoka figura tolu: ida “atan Jahwéh nian” – figura sakrifísiu nian – ne'ebé hanesan bibi-malae la nameek lori atu oho iha matadouru (Is 53,6-7; kf. Jr 11,19; Apost. 8,26-38); ida “bibi-oan paskál” – figura libertasaun nian – ne'ebé nia raan sai sinál efikás atu manán eskravidaun (Ex 12,12-13.27;24,8; kf. Jo 1,29; 1 Cor 5,7; 1 Pe 1,18-19); no ida “bibi-oan apokalíptiku” – figura ho podér liurai nian – vensedór mate nian (imajen ne'e mak karakteristikana literatura apokalíptika, iha-ne'ebé mosu nu'udar bibi-oan vensedór, gia bibi sira nian, ho kbiit no autoridade réal – kf. livru dahuluk Henoc nian, 89,41-46; 90,6-10.37; Testamentu José nian, 19,8; Testamentu Benjamim nian, 3,8; Targum Jerusalém nian kona-ba Ex 1,5). Autór Apokalipse apresenta, ho maneira orijinál no sintétika, mistériu sakrifísiu nian, libertasaun no vitória nian, ne'ebé korresponde ho Kristu mate, moris-hi'as no hetan glória.

“Bibi-oan” (Kristu) Maromak foti nu'udar liurai: nia asume kbiit liurai nian no tuur iha tronu Maromak nian. Iha ne'ebá mak nia simu kbii tno glória divina. Ne'e pontu aas liu Jezús nia aventura divinu-umana, no ba nia kriaun hotu hasa'e louvór/hahín: buat moris sira, katuas sira (vers. 5-8), anju sira (vers. 11-12), no kriatura hotu (vers. 13), hahú husi fatin sira naksubar liu rai nian, libur sira nia lian atu hahí. Templu sai boot hanesan mundu. Ne'e mak liturjia kósmika ida, iha ne'ebé kriaun tomak celebra Kristu ne'ebé saran an ba mate, moris hi'as, vensedór no halo nia sai sentru “kosmos” nian.

EVANJELLU – Jo 21,1-19

Kapítulu ikus Evanjellu nu'udar João haktuir la halo parte obra orijinál (obra orijinál remata ho konkluzaun kap. 20,30-31 nian); nia mak testu ida aumenta tan ikus ona, nune'e apresenta

diferensa iha linguajen, iha estilu no teolojia mós, kompara ho kapitulu ruanulu seluk. La hatene didi'ak ninia orijen husi ne'ebé; maibé iha karakterístika ruma hanesan ho Joào nian ne'ebé lori ita hanoin katak João evanjelista nia eskolante sira mak kompleta ho testu ikus ne'e.

Iha kapitulu ne'e, la haktuir ona notísia kona-ba Jezús nia moris, mate no resureisaun. Protagonista sira mak grupu ida dixípulu sira-nian, ne'ebé dedika an ba atividade misionária. Autór deskreve relasaun ne'ebé "komunidade iha misaun" ne'e iha ho Jezús, reflète kona-ba Jezús nia fatin iha atividade misionária Igreja nian no salienta kondisaun sira ne'ebé tenke iha atu misaun fó fuan.

MENSAJEN

Testu fahe ba parte rua.

Primeira parte (vers. 1-14) mak ai-kanoik ida kona-ba comunidade nia misaun. Nia utiliza linguajen simbóluka no iha karáker "sinál" nian.

Nia hahú hodi apresenta dixípulu sira: na'in hitu. Sira reprezenta totalidade ("hitu") Igreja nian, ne'ebé kompromete an iha misaun no nakloke ba nasaun no povu hotu.

Autór apresenta comunidade ne'ebé bá tiha-ikan: ho imajen kail ikan nian, evanjellu sinóptiku sira reprezenta misaun ne'ebé Jezús konfia ba ninia dixípulu sira (kf. Mc 1,17; Mt 4,19; Lc 5,10): liberta ema hotu ne'ebé moris iha tasi laran sofrimentu/taterus no eskrauidaun nian. Pedro prezide misaun: nia mak foti inisiativa; sira seluk tuir nia ho modu inkondisionál. Iha ne'e testu refere ba fatin uluk ne'ebé Pedro okupa iha animasaun Kreda dahuluk nian. Tiha ikan ne'e halo durante kalan. Kalan mak tempu nakukun nian: signifika auzénsia Jezús nian ("Wainhira sei loron, Ha'u sei halo Ida ne'ebé haruka Ha'u mai nia serbisu; kalan to'o mai wainhira ema ida la bele serbisu. Wainhira Ha'u iha mundu, Ha'u mundu nia naroman" – Jo 9,4-5). Rezultadu husi dixípulu sira nia hahalok (iha kalan lahó Jezús) mak frakasu totál ("basá ketak husi Ha'u, imi la bele halo buat ida" – Jo 15,5).

Ho dadeersan ne'ebé mai, koinside mós ho Jezús nia prezensa (Nia mak mundu nia naroman). Jezús la hamutuk ho sira iha roo, maibé iha rai: Nia la akompaña dixípulu sira iha tiha-ikan; ninia ezerse nia asaun iha mundu liuhusi dixípulu sira.

Tanba konsentra an iha sira nia esforsu inutil, sira la rekoñese Jezús bainhira nia apresenta An. Grupu lakon orientasaun no laran triste, ita bele haree ne'e husi Jezús nia pergunta ("imi iha buat ruma atu han?"). Maibé Jezús fó indikasuan ba sira no dai sai nakonu ho ikan: rezultadu ne'e mai husi dixípulu sira-nia dosilidade atu tuir Jezús nia indikasaun sira. Nune'e ita haree katak misaun nia ézitu la mai husi esforsu umanu, maibé loos duni tanba prezensa moris no Liafuan Na'i moris-hi'as nian.

Rezultadu sorprendente tiha-ikan nian mak halo dixípulu ida atu rekoñese Nia. Dixípulu ida-ne'e – dixípulu ne'ebé Nai hadomi – mak ida-ne'ebé nafatin besik ba Jezús, iha sintonia ho Jezús no halo ho modu intensu, esperiénsia Jezús nia domin nian: ida ne'ebé halo esperiénsia ida-ne'e de'it mak iha kapasidade atu lee sinál sira ne'ebé identifika Jezús no komprende ninia prezensa liuhusi moris ne'ebé suli husi comunidade nia hahalok iha misaun. Paun sira ne'ebé Jezús fó hodi simu dixípulu sira mak sinál ida domin nian, servisu nian, atensuan nian ne'ebé Jezús soi ba comunidade ne'ebé hala'o misaun iha mundu: iha-ne'e aluzaun ida ba Eukaristia, ba paun ne'ebé Jezús oferese, ba moris ne'ebé nia kontinua habiit comunidade iha misaun.

Difisil atu fó esplikasaun kona-ba número ikan nian ne'ebé kaer iha rede laran (153). Ne'e mak número triangulár nu'udar rezultadu tau hamutuk número ida (1) to'o sanulu-resin-hitu (17). Número sanulu-resin-hitu mak número bíbliku ida... Maibé número sanulu no sanulu-resin-hitu simboliza plenitude no universalidade. Esplikasaun seluk S. Jerónimo mak fó... Tuir nia, naturalista antigu sira distingue ikan espésie 153: nune'e, número indika totalidade

umanidade nian, ne'ebé halibur an iha Igreja hanesan. Buat rua ne'e hotu signifika totalidade no universalidade.

Iha segunda parte testu nian (vers. 15-19), Pedro konfessa ba dala tolu ninia domin ba Jezús (durante paixaun, dixípulu hanesan mak nega Jezús ba dala tolu, hodi rekuza "halo dalan" hamutuk ho "mestre" iha aventura domin nian ne'ebé saran nu'udar don). Pedro – ita hanoin fali – mak dixípulu ne'ebé iha han-kalan ikus, lakohi atu Jezús fase nia ain sira tanba, ba nia, Mesias tenke sai liurai ho kbiit maka'as, dominadór, no la'ós liurai ida servisu nian no don moris nian. Iha tempu ne'ebá, hodi hanoin hanesan ne'e (superioridade no autoridade), Pedro hatudu katak nia seidakomprende katak lei boot liu komunidadade Jezús nian mak domin totál, domin ne'ebé hatudu nu'udar servisu no ba to'o saran moris rasik. Jezús dehan momoos ba Pedro katak sé mak soi mentalidade ida domíniu no autoridade nian la hetan fatin iha komunidadade sarani (kf. Jo 13,6-9).

Nune'e konfisaun domin nian ba dala tolu ne'ebé Jezús husu ba Pedro korresponde ho konvite ida atu nia muda definitivamente mentalidade. Pedro simu konvite atu komprende katak, iha Jezús nia komunidadade, valór fundamentál mak domin; la eziste adezaun loos ba Jezús, se ema la dispostu atu tuir dalan domin nian no saran an nian ne'ebé Jezús rasik halo. Halo nune'e de'it mak Pedro bele "tuir" Jezús (kf. Jo 21,19).

Tempu hanesan, Jezús entrega ba Pedro misaun atu prezide komunidadade no anima nia; maibé konvida mós nia atu komprende iha-ne'ebé mak autoridade nia hun loloos: ida-ne'ebé hadomi barak liu no aseita lójika servisu no doasaun moris nian de'it mak bele prezide komunidadade Jezús nian.